

Hashemi: Nisam organizirao vodove smrti

20 februar 2012 Izmijenjeno 17:24 CET

Irački potpredsjednik odbacio vladine tvrdnje da stoji iza 150 bombaških napada i atentata od 2005



Hashemi je postavio pitanje zašto baš njega izdvaja vlada Nourija al-Malikija [AP Arhiva]

Potpredsjednik Iraka Tareq al-Hashemi javno je odbacio vladine tvrdnje da je organizirao „vodove smrti“ od 2005. godine, opisujući ih „politički motiviranim“, te dodavši da su vlasti mučenjem natjerale njegove tjelohranitelje da potpišu lažne izjave. U polusatnom govoru u ponedjeljak poslijepodne, Hashemi, koji je utočište našao u sjevernom Iraku otkad su objavljene vladine optužbe, apelirao je na „sve poštene iračke građane“ da stanu u njegovu odbranu.

Sektaški sukob

Hashemi, koji je sunit, postavio je pitanje zašto baš njega većinska šiitska vlada izdvaja. „Cilj je postao vrlo jasan: ocrniti političku sliku koristeći laži, krivotvorenje i prevaru“, kazao je on u televizijskom obraćanju snimljenom u kurdskom gradu Irbilu, gdje se vlasti autonomne pokrajine protive izručenju Hashemija Bagdadu.

Prošle sedmice, sudsko vijeće u Bagdadu je zaključilo da je Hashemi organizator najmanje 150 bombaških napada i atentata od 2005. Zaključci su doneseni nakon što je u decembru izdat nalog za Hashemijevo hapšenje, kada je irački potpredsjednik optužen da je svojim tjelohraniteljima platio 3.000 dolara da ubiju pripadnike snaga sigurnosti i vladine zvaničnike.

Nalog za hapšenje izdat je dan nakon što su se američke trupe povukle iz Iraka, što su kritičari opisali prvim znakom da premijer Nouri al-Maliki preuzima vlast bez straha od miješanja Sjedinjenih Američkih Država. U to vrijeme, državna televizija objavila je snimke koji prikazuju navodna priznanja ljudi za koje je rečeno da su Hashemijevi tjelohranitelji.

Apel građanima

Hashemi, dugogodišnji Malikijev politički rival, u ponedjeljak je kazao kako su njegovi tjelohranitelji mučeni kako bi dali izjave, te da im još uvijek nije omogućena pravna pomoć. „Imamo fotografije modrica na njihovim licima i tijelima“, kazao je on. Zaključci sudskog vijeća nisu pravno obavezujući, ali su predati krivičnom sudu.

Vijeće je saopćilo da je njihova istraga prva nezavisna revizija Hashemijevog slučaja, ali kritičari i neki pravni eksperti tvrde da su sudije pristrasne prema Malikiju. „Naš pravosudni sistem još služi nekim utjecajnim ljudima“, kazao je Hashemi. On je pozvao Iračane da stanu uz njega i odbiju optužbe, iako nije specifično tražio da izađu na demonstracije. „Pitanje Hashemija je pitanje svakog građanina koji ne tolerira poniženja i koji odbija represiju“, kazao je on.

“Suočavanje sa konspiracijom protiv Hashemija i njegova odbrana postala je obaveza i dužnost svih poštenih Iračana koji se nadaju zemlji bez nepravde i korupcije“.

Izvor: Al Jazeera